

Փաստաբանները սպասում են

07.10.2012 05:38



ՀՀ Վճռաբեկ դատարանի կողմից երկակի ստանդարտների կիրառման փաստերը համակարգող փաստաբանական հանձնախումբը սպասում է հետագա զարգացումներին: Ինչպես «Փաստինֆո»-ի թղթակցի հետ զրույցում նշեց հանձնախմբի անդամ, փաստաբան Գևորգ Գյոզալյանը, իշխանությունները հավաստիացրել են, որ դատաիրավական բարեփոխումների 2012-2016թթ. ռազմավարական ծրագրով նախատեսված օրենսդրական կարգավորումները, ինչպես նաև կադրային փոփոխությունները կշտկեն իրավիճակը: Նա միաժամանակ տեսակետ հայտնեց, որ խնդիրը ոչ թե օրենքների, այլ դրանք կիրառելու մեջ է, խնդիրն անձերն ու երկակի ստանդարտներն են: Իշխանությունը փաստաբաններին հավաստիացրել է, որ խնդրահարույց բոլոր օբյեկտիվ և սուբյեկտիվ գործոնները հաշվի կառնվեն:

Հիշեցնենք, որ ամիսներ առաջ փաստաբանները ստեղծել էին հանձնախումբ, որն ի մի էր բերել Վճռաբեկ դատարանի կողմից երկակի ստանդարտների կիրառման, խախտումների վրա «աչք փակելու» դեպքերը, փաստաբաններն անգամ դիմել էին բողոքի ակցիայի՝ դատադուլի, և խոստացել առկա խնդիրները չլուծվելու դեպքում դիմել բողոքի ակցիայի՝ արդեն երկակի ստանդարտներից տուժած վստահորդների մասնակցությամբ:

Փաստաբանը նշեց, որ դեռևս Վճռաբեկ դատարանի մարտավարությունում որևէ փոփոխություն տեսանելի չէ: «Մեր ակցիայից հետո մի քանի բողոք ներկայացրել ենք, խնդիրն այն չէ, որ վերադարձնում են, թող վերադարձնեն այն հիմքով, որ մեզ մոտ կասկած չառաջանա օբյեկտիվության վերաբերյալ», - ասաց փաստաբանը՝ համեմատության համար նկատելով, որ վերջերս երկու դիմում է ներկայացրել ՍԴ, որից մեկը վերադարձվել է, սակայն ՍԴ-ի դեպքում իր մոտ երբեք կասկած չի առաջանում:

Գ. Գյոզալյանը մեծ հույսեր չի կապում, որ Վճռաբեկ դատարանի դատավորները կբարեփոխվեն, և «մենք շատ ավելի հետաքրքիր Վճռաբեկ դատարան ունենանք», որը կգործի իր սահմանադրաիրավական կարգավիճակին համապատասխան: «Իրենց պետք է մի ուժ, որը պարտադրի, որ փոխվեն՝ դա նախագահն է», - ասաց փաստաբանը:

Իսկ նախագահական նստավայրից եկող ազդակներն,

ըստ փաստաբանի, հոլսադրող են: Փաստաբանը
լավատես է և կարծում է , որ «սա այն դեպքերից չէ,
երբ խոսքից գործի չեն անցնում»:

Գ. Գյոզալյանը հիշեցրեց, որ ակցիայից հետո
փաստաբանների բողոքի ձայնը լսելի դարձավ
իշխանության վերին մարմիններում,
մասնավորապես՝ նախագահական նստավայրում:
Երկրի ղեկավարը հրավիրեց խորհրդակցություն, որին
առաջին անգամ այդ ֆորմատով մասնակցեց
Փաստաբանների պալատի նախագահը: Այդ
ժամանակ էր, որ Պալատի նախագահը ներկայացրեց
փաստաբանների դժգոհությունները,
մասնավորապես՝ Վճռաբեկ դատարանից, որը
ստորադաս դատարանների կողմից թույլ տրված
խախտումները շտկելու ունակ վերջին դատական
օղակն է: Հանդիպումներ եղան նաև
փաստաբանական հիշյալ հանձնախմբի անդամների
հետ՝ տարբեր ֆորմատներով:

Ի լրումն այդ ամենի՝ փաստաբանները
ներկայացրեցին տեղեկանք այն գործերի վերաբերյալ,
որտեղ Վճռաբեկ դատարանը երկակի ստանդարտներ
էր կիրառել:

«Մենք դա ներկայացրեցինք վերջերս՝ սեպտեմբերի
վերջերին, և նորից նախագահը հրավիրեց
խորհրդակցություն», որի ընթացքում երկրի
ղեկավարը հարց բարձրացրեց, թե ինչ է արել
Վճռաբեկ դատարանը փաստաբանների
առաջարկների առնչությամբ:

Ըստ Գ. Գյոզալյանի, խնդիրների շուրջ տեղի ունեցած
որոշակի քննարկումները ՓՊ նախագահը ընդհանուր
առմամբ գոհացուցիչ է համարել:

Հեղինակ:

«Փաստինֆո»

Աղբյուրը՝ <http://www.pastinfo.am>